

四庫全書

集部

欽定四庫全書

集部

蘇詩補註卷三

詳校官庶吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣牛稔文

謄錄監生_臣沈世玫

欽定四庫全書

蘇詩補註卷二

翰林院編修查慎行撰

古今體詩三十九首

嘉祐五年庚子春自
荊州陸行赴京師作

息壤詩

并引

淮南子曰：鯀湮洪水，盜帝之息壤。帝使祝融殺之于羽淵。今荊州南門外有狀若屋宇陷入地中，而猶見其脊者，旁有石記云：不可犯。畚鍤所及，輒復如故。又頗以致雷雨，歲大旱，屢發有應。予感之，乃為作詩。

辭曰

帝息此壤以藩幽臺有神司之隨取而培帝勅下民無
敢或開惟帝不言以雷以雨惟民知之幸帝之恕帝茫
不知誰敢以告帝怒不常下土是震使民前知是役于
民無是墳者誰取誰予惟其的之是以射之

慎按幸帝之恕起字似當作怒誰敢以告告
字叶韻似當作訴諸刻本恐訛存疑再考

附子由作

江上寒沙薄如席一夕墳起成高丘江流傾轉力

不勝左鑿右吐非自由南郡城南獨何者平地生
長殊不休當中屋背不盈尺深入百丈皆石樓古
人不知下有怪發破不掩水漲浮傳言夏鯨塞澤
水上帝愛此無敢偷竊持大畚負長鎛刺取不已
帝使流禹知水怒非塞止網捕百怪雜蜃鰕掘壕
入土不計丈投擲填壓聲鳴啾一時既定憂後世
恐此竊出壤九州神人已死無復制故以此土封
其頭發之輒滿不可既意使靈物長幽囚前年大

旱千里赤取土盈掬雨不收誰言咫尺舊黃壤中
有千歲龍與虬高山萬仞猶可削嗟此何獨生如
疔天長地遠莽無極雖有缺壤誰能賙我疑天意
固有在患世多事窮鑄鏤埏陶鼓鑄地力困久不
自補無為憂世無女媧空白石磊磊滿地如浮漚
耕田鑿井自無已息壤無幾安能酬

荊州十首

游人出三峽楚地盡平川北客隨南賈吳檣間蜀船江

侵平野斷風捲白沙旋欲問興亡意重城自古堅

荊州

元和郡縣志荊南節度屬江南西道太平寰宇記荊州江陵郡屬山南東道楚郢都秦為南郡

即今州也九域志西至峽州水路三百三十里北至襄州四百五十里至東京一千八百八十里

三

峽

庾仲雍荊州記巴楚有明月峽廣川峽東突峽今謂之巫峽秭歸峽歸鄉峽太平寰宇記巫峽在巫

山縣明月峽在夷陵懸崖間黃牛峽在夷陵西又云

三峽者西峽巫峽歸峽也峽程記三峽者明月廣谿

仙山也○慎按三峽之名有二或以瞿塘滢澦巫山為三峽或云州境之明月峽黃牛峽與西陵峽為三

峽

南方舊戰國慘澹意猶存慷慨因劉表淒涼為屈原廢

城猶帶井古姓聚成村亦解觀形勝昇平不敢論

古姓

太平寰宇記武昌郡六姓吳伍程史龍郢武陵郡三姓卞伍龔皆載山南東道荊州下

楚地濶無邊蒼茫萬頃連耕牛未嘗汗投種去如捐農
事誰當勸民愚亦可憐平生事遊惰那得怨凶年

楚地

元和郡縣志春秋以來楚國之都謂之郢都西接巴東連雲夢亦一都會之所史記鵲首楚

之分自張十八度至軫十二度楚之分野

游惰

太平寰宇記荆之為言強也陽盛物堅其氣急悍故

人多剽輕唐至德以後流傭爭食者衆五方雜處風俗大變五月五日競渡戲舟廢業耗民莫甚于此

朱檻城東角高王此望沙江山非一國烽火畏三巴戰

骨淪秋草危樓倚斷霞百年豪傑盡擾擾見魚蝦

高王

五代史南平世家高季興于後梁開平元年為荆南節度末帝時封渤海王後唐莊宗朝封南

平王子從誨

望沙

荆州志城東南有望沙樓後梁時高季興建以望沙津陳亮咨知荆

嗣封父爵

州更名仲宣樓五代史南平世家高從誨多權詐晉

高祖遣陶穀為國信使從誨晏穀于望沙樓大陳戰

艦于樓下曰吳蜀不賓

三巴

華陽國志劉璋改永寧為巴郡以固陵為巴東

願修武備以待師期

墊江以上為巴

西是為三巴

慎按此詩因南平而致慨於五季也季興初

為荆南節度所領止江陵歸峽三城地狹而

兵弱難與諸國爭衡父子祖孫與五代相終
始假其封號竊據單州是時楊李擅吳王氏
保閩劉氏鷗張于南粵王孟跳梁于蜀中莫
不帝制自為志圖兼并獨高氏所向稱臣中
間不自揣量間一構兵初敗於王宗壽再敗
於孔勛及後唐伐蜀請以本道兵自取夔萬
等州終不敢出畏蜀如虎之譏其能解免于
未幾而強弱大小同歸漸滅百年以來戰骨

已銷孤城猶在千秋形勝之區惟危樓倚斷
霞耳一時豪傑自命者細瑣么庸無足比數
魚蝦擾擾一語說得五代君臣及僭號諸國
可憐可憫可鄙可羞又無論孱弱之高氏也
施氏補注此篇專為南平而發淺之乎論蘇矣
沙頭烟漠漠來往厭喧卑野市分塵鬧官船過渡遲遊
人多問卜僮叟盡攜龜日暮江天靜無人唱楚辭

沙頭

元微之江陵玩月詩闕咽沙頭市荊州志市在江陵縣東南十五里謂之沙頭市

攜龜

此譏楚人尚巫也施氏
補注引支牀龜甚無謂

太守王夫子山東老俊髦壯年聞猛烈白首見雄豪食
雁君應厭驅車我正勞中書有安石慎勿賦離騷

太守

先生全集有上荊州王兵部書又有與王刑部
書二人皆為荊州守又同姓其名宇俱失考

殘臘多風雪荊人重歲時客心何草草里巷自嬉嬉爆
竹驚鄰鬼驅儺逐一作聚小兒故人應念我相望各天涯

爆竹

宗慄荆楚歲時記正月一日雞鳴而起先于庭
前爆竹以辟山魃惡鬼十二月八日為臘村人

並擊細腰鼓作金
剛力士以逐疫

驅儺

周禮夏官方相氏掌蒙熊皮
黃金四目玄衣朱裳執戈揚

盾帥百隸而時儼以索室毆疫呂氏春秋注前
歲一日擊鼓驅疫癘之鬼謂之逐除亦曰儼

江水深成窟潛魚大似犀赤鱗如琥珀老枕勝玻璃上

客舉雕俎佳人搖翠篴登庖更

一作兼

作器何以免屠割

琥珀

本草青魚生江湖間多以作鮓所謂五侯鯖也其頭中枕骨蒸令氣通曝乾狀如琥珀荆楚人

煮拍作酒器梳篴甚佳

老枕

爾雅魚枕謂之丁注云枕在頂骨中如丁字

北雁來南國依依似旅人縱橫遭折翼感惻為沾巾
日誰能挹高飛不可馴故人持贈我三嗅若為珍

荆俗益好食雁故詩云爾合第
六首食雁君應厭句觀之可見

柳一作脩門京國道驅馬及春陽野火燒枯草東風動綠

芒北行連許鄧南去極衡湘楚境橫天下懷王信弱王

脩門

招魂篇歸來兮脩門王逸注郢城門也盛弘之
荆州記郢南門二門一名龍門一名脩門唐吳

融留獻荆南成相公詩行行柳門路回
首下離東則荆州別有柳門他無可考許鄧

太平寰宇記許

州許昌郡屬河南道西南至汝州一百八十里鄧州
南陽郡屬山南東道南至襄州一百八十里北至汝
州四百
衡湘文獻通考荆湖南路衡州秦屬長
沙郡吳以地置衡陽相東二郡

渚宮

渚宮寂莫依古郢楚地蒼茫非故基二王臺閣已鹵莽

公自注湘東王高氏

何況遠問縱橫時楚王獵罷擊靈鼓猛士操

舟張水嬉釣魚不復數魚鼈大鼎千石烹蛟螭當時郢

人架宮殿意思絕妙般與倭飛樓百尺照湖水上有燕

趙干蛾眉臨風揚揚意自得長使宋玉作楚詞秦兵西

來取鐘簴故宮禾黍秋離離千年壯觀不可復今之存

者蓋已早池空野迥樓閣小雅有深竹藏狐狸臺中絳

帳誰復見臺下野水

一作鴨

浮清漪

一作綺

綠窗朱戶春晝

閑想見深屋彈朱絲腐儒亦解愛聲色何用白首談孔

姬沙泉半涸草堂在破窗無紙風颼颼陳公蹤蹟最未

遠士

一作七

瑞寥落今何之百年人事知幾變直恐荒廢成

空陂誰能為我訪遺蹟草間應有湘東碑

渚宮

郭允蹈蜀鑑江陵有津鄉故城在今江陵縣東渚宮即其地。按左傳楚子西沿漢沔江將入

郢王在渚宮下見之太平寰宇記亦引此未古郢余

嘗云渚宮襄王所建也施氏補注謬今駁正

古郢

余

古渚宮舊事驚熊為周文王師成王封其孫熊繹于楚後六世熊渠立又數世至文王國始大遂都郢今

江陵北郢城紀城是也

二王臺閣

渚宮舊事湘東王繹于子城

通波閣跨水為之南有芙蓉堂東有禊飲堂西有鄉射堂堂置竹塍可移動東南有連理堂堂北有映月

亭修竹堂臨水齋齋前高山山有石洞潛行苑中山
上有陽雲樓北有臨風亭明月樓顏之推詩屢陪明
月宴是也竹林堂庭前有桂竹冬月抽筍味如桂而
辛其中有劉宅紫薔薇康家四出薔薇白馬里薔薇
長沙千葉薔薇並以長格架其上下有十間花房仰
而望花葉交映其間花草雖繁竹林彌盛故號竹林
堂太平寰宇記謂之湘東苑高氏事無可考

郢人宮殿

渚宮舊事靈王作
頃宮三年未息而

為章華之臺翟人來朝王誇之與客登章華之臺三
休乃至太平寰宇記章華臺在江陵東三十三里臺
形三角名勝志云楚離宮也又謂之豫章臺水經注
江水又東得豫章口是也陳子昂詩遙遙下巫峽望
望得陳公

陳公

按宋史天禧中陳堯咨以方正言
知制誥出守荆南事蹟無可考

荆門惠泉

泉源從高來走下隨石脈紛紛白沫亂隱隱蒼崖折紫

灣

一作

回成曲沼清澈見肝膈滾

別本作
衆者訛

瀉為長溪奔駛

蕩蛙蠃初開不容梳漸去已如帛傳聞此山中神物嬾

頗 一作

遭謫不能致雷雨灑灑吐寒碧遂令山前人千古

灌稻麥

荆門

太平寰宇記荆門本漢舊縣荆襄之要津唐末
荆南高氏建為軍北至襄州一百七十里九域

志宋開寶五年即江陵府荆門鎮建軍與太平寰宇
記沿革稍異要之非宜都荆門山也施氏補注題下

云荆門山在宜都大江之南與虎牙相對詭托于公自注他本俱無今駁正

惠泉

葛立方
韻語陽

秋荆門軍有惠泉李德裕題詩云茲泉由太潔終不
蓄纖鱗到底清何益涵虛祇自貧至今碑版存焉本
名蒙泉沈傳師有蒙泉聊息駕可以洗君心之句而
德裕乃直曰惠泉曹學佺曰荆門州西有蒙惠二泉
即州城所引以為池者源出象山北曰蒙南曰
惠蒙泉常寒惠泉常溫葛立方混而為一非也

附子由作

泉源何從來山下長溪發油然本無營誰使自激
冽茫茫九地底大水浮一葉使水皆為泉地已不
勝洩應是眾水中獨不容至潔涓涓自傾瀉奕奕
見清澈石泓淨無塵中有三尺雪下為百丈溪冷

不受魚鼈脫衣浣中流解我雙足熱樂哉泉上翁
大旱不知渴

次韻答荆門張都官維見和惠泉詩

楚人少井飲地氣常不洩蓄之為惠泉坐若有所拆泉
源本無情豈問濁與澈貪愚彼二水終古恥莫雪只應
所處然遂使語異別泉旁地平衍泉上山巒嶮君子慎
所居此義安可闕古人貴言贈敢用况高節不為冬霜
乾肯畏夏日烈泠泠但不已海遠要當徹

張維

吳興志張子野之父名維以子都官郎中貴封正四品能詩孫莘老為作十咏圖序疑即其人

附子由作

荒涼荆門西泉水誰為洩發源雖甚微來意不可
拆平鋪清池滿皎皎自明澈甘涼最宜茶羊炙可
用雪炎風五月交中夜吐明月太守燕已還青嶂
空嶠嶠泉上白髮翁來飲杯饌闕酌水自獻酬箕
踞無禮節區區游泉人常值午日烈回首憂重城
賞玩安能徹

涖陽早發

富貴本無

一作先

定世人自榮枯囂囂好名心嗟我豈獨

無不能便退縮但使進少徐我行念西國已分田園蕪
南來竟何事碌碌隨商車自進苟無補乃是嬾且愚人
生重意氣出處夫豈徒永懷江陽叟種藕春滿湖

涖陽

按涖乃水名虔州志龍南龍川之交有水曰涖非先生經由之地也存疑俟再考

江陽

水經注江水東南過犍為江陽縣郭允蹈蜀鑑江陽今瀘州曹學佺名勝志晉時曾置江陽郡于眉州此

為得之

附子由作

春氣入楚澤原上草猶枯北風吹栗林梅蕊颯已
無我行亦何事驅馬無疾徐楚人信稀少田畝任
蓁蕪空有道路人擾擾不留車悲傷彼何嬾歎息
此亦愚我今何為爾豈亦愚者徒行行楚山曉霜
露滿陂湖

夜行觀星

天高夜氣嚴列宿森就位大星光相射小星闇若沸天

人不相干嗟彼本何事世俗強指摘一一立名字南箕
與北斗乃是家人器天亦豈有之無乃遂自謂迫觀知
何如遠想偶有似茫茫不可曉使我長歎喟

漢水

捨棹忽逾月沙塵困遠行襄陽逢漢水偶似蜀江清蜀
江固浩蕩中有蛟與鯨漢水亦云廣欲涉安敢輕文王
化南國遊女儼如卿洲中浣紗子環珮鏘鏘鳴古風隨
世變寒水空冷冷過之不敢慢佇立整冠纓

漢水

按漢沔二水水經通稱漢有二源出鞏昌秦州之嶓冢至四川由重慶江津縣入江此西漢水

也出漢中府沔縣之嶓冢至漢陽府入江襄陽寰宇

者東漢水也水經所紀沔與漢合者也

襄陽

寰宇

記山南東道襄州本楚邑檀溪帶其西峴山亘其南為楚之北津建安十三年始置襄陽郡以地在襄山之南為名南至荆門軍三百二十五里東北至唐州二百五十里輿地廣記屬京西南路去江陵步道五百勢同唇齒

襄陽古樂府三首

野鷹來

野鷹來萬山下荒山無食鷹苦飢飛來為爾繫絲絲北

原有兔老且白年年養子秋食菽我欲擊之不可得年
深兔老鷹力弱野鷹來城東有臺高崔嵬臺中公子着
皮袖東望萬里心悠哉鷹何在嗟爾公子歸無勞使鷹
可呼亦凡曹天陰月黑狐夜嘯

呼鷹

襄陽記劉表墓在城東
又東二十里有呼鷹臺

附子由作

野鷹來雄雉走蒼茫荒榛下瑇瑁大如斗鷹來蕭
蕭風雨寒壯士臺中一揮肘臺高百尺臨平川山

中放火秋草乾雉肥兔飽走不去野鷹飛下風蕭
然嵯峨呼鷹臺人去臺已圯高臺不可見况復呼
鷹子長歌野鷹來當年落誰耳父生已不武子立
又不強北兵果南下擾擾如驅羊鷹來野雉何暇
走束縛籠中安得翔可憐野雉亦有爪兩手捽鷹
猶可傷

上堵吟

樂城集
缺和詩

臺上有客吟秋風悲聲蕭散飄入宮臺邊游女來竊聽

欲學聲同意不同君悲意何事千里金城兩稚子白馬
為塞鳳為關山川無人空且閒我悲亦何苦江水冬更
深鰕魚冷難捕悠悠江上聽歌人不知我意徒悲辛

堵

水經注沔水又東過堵陽縣堵水出焉歷新城郡故漢中之房陵縣漢末為郡又分置上庸郡其城

三面注水九域志竹山縣有堵水

千里金城

元和郡縣志引盛弘之荆州記云孟達為新城

守登白馬山嘆曰劉封中賊据金城千里而不能守豈丈夫哉因為上堵吟今人猶傳此聲音韻憤激其哀思之音乎郭允蹈蜀鑑昭烈遣孟達攻房陵下之遣劉封乘沔水與達會攻上庸太守申耽舉郡降以耽為上庸太守耽弟儀為西城太守定漢中上庸西城皆今金州地也章武元年孟達以上庸降魏合房

陵上庸西城三郡為新城以達
領之入城登白馬塞嘆云云

慎按元和郡縣志白馬山在竹山縣西南三十里太平寰宇記云即新城山荊州記所謂孟達登白馬山而嘆即此按竹山舊屬襄陽府之均州施氏補注遠引衡州白馬關者大謬今駁正

襄陽樂

使君未來襄陽愁提戈入市襄陽來自從羶裘南渡沔

襄陽無事多春遊襄陽春遊樂何許岷山之陽漢江浦
使君朱旆來翻翻人道使君似羊杜道邊逢人問洛陽
中原苦戰春田荒北人聞道襄陽樂目送飛鴻應斷腸

襄陽樂

南史劉道產初為無錫令後為雍州刺史領寧蠻校尉加都督兼襄陽太守善于臨職在

雍部政績尤著蠻夷前後不受化者皆順服百姓樂業由此有襄陽樂歌自道產始也

附子由作

誰言襄陽苦歌者樂襄陽太守劉公子千年未可
忘劉公一去歲時改惟有州南漢水長漢水南流

峴山碧種稻耕田泥沒尺里人種麥滿高原長使
越人耕大澤澤中多水原上乾越人為耕楚人食
火耕水耨古常然漢水魚多去滿船長有行人知
此樂來買槎頭縮項鱸

峴山

遠客來自南游塵昏峴首過關無百步曠蕩吞楚藪登
高忽惆悵千載意有偶所憂誰復知嗟我生苦後團圓
山上檜歲歲閱榆柳大材固已殊安得同永久可憐山

前客倏忽星過雷賢愚未及分來者當自剖

峴首

襄沔記紫蓋山萬山峴山謂之三峴宋時改紫蓋山為中峴以峴山為峴首

山上檜

名勝記晉柏在峴山上相傳羊叔子手植有碑題曰晉柏

賢愚

暗用羊祐傳與鄒湛等登峴山慨歎

語

萬山

公自注時獨不游問輟而作

西行度連山北出臨漢水漢水感成潭旋轉山之趾禪
房久已壞古甃含清泚下有仲宣欄綆刻深容指回頭
望西北隱隱龜背起傳云古隆中萬樹桑柘美月炯轉

山曲山上見洲尾綠水帶平沙盤盤如抱珥山川近且秀不到嬾成恥問之安能詳畫地費簪篸

萬山

元和郡縣志萬山一名漢臯山在襄陽縣西十里與南陽鄧縣分界處古諺云襄陽無西言其

界迫促太平寰宇記萬山北隔沔水

潭

孟浩然萬山潭詩自注云即沉碑潭

仲宣欄

襄陽耆舊

傳王粲與繁欽並鄰同井其墓及井見在曾鞏元豐類藁魏侍中王粲石井欄記參謀太子舍人甄濟撰上元二年來鎮移井欄置于襄州刺史官舍集古錄并欄記有二貞元十七年者于頔撰胡鉉書上元二年者甄濟撰彭朝書

隆中

諸葛來西國千年愛未衰今朝游故里蜀客不勝悲誰
言襄陽野生此萬乘師山中有遺貌矯矯龍之姿龍蟠
山水秀龍去淵潭移空餘蜿蜒蹟使我寒涕垂

隆中

王象之碑目蜀丞相諸葛公碑今在武侯故宅
晉李興撰南雍州記隆中有諸葛故宅荆州記

宅西有山臨水孔明嘗登之鼓琴為梁父吟因名此
山為樂山太平寰宇記襄陽縣有諸葛宅蜀志三顧
草廬即此宅也有井襄陽野

裴松之三國注引漢晉
春秋曰亮家于南縣之

深四丈壘砌如初
鄧縣商芸小說云孔明躬耕南陽乃襄陽之南陽墟
非今之南陽郡也愚按襄陽東二十里有鄧城習鑿
齒記所云楚王城鄧之濁水即斯地矣蓋鄧之
南鄙也今為鎮裴松之謂在南陽鄧縣者訛

竹葉酒

楚人汲漢水釀酒古宜城春風吹酒熟猶似漢江清
舊何人在邱墳應已平惟餘竹葉酒留此千古情

宜城酒

太平寰宇記宜城襄陽屬縣在府南九十五里本楚之鄆都天寶元年改宜城縣故城在

今縣南其地出美酒俗號宜城酒為竹葉春名勝志
宜城有金沙泉在縣東二里其泉造酒甘美世稱宜
城醞又名竹葉春梁元
帝詩宜城醞酒今朝熟

鱖魚

曉日照江水遊魚似玉瓶誰言解縮項貪餌每遭烹杜

老當年意臨流憶孟生吾今又悲子輟筋涕縱橫

縮項鰢

襄陽耆舊傳峴山下漢水中出鰢魚極肥美宋張敬兒為刺史作六櫓船獻齊高帝曰奉

槎頭縮項鰢

憶孟生

孟浩然詩鳥泊隨陽雁魚藏縮項鰢杜甫詩復憶襄陽孟浩然

新詩句句盡堪傳只今耆舊無新語漫釣槎頭縮項鰢

食雉

雄雉曳脩尾驚飛向日斜空中紛格鬪綵羽落如花喧
呼勇不顧投網復誰嗟百錢得一雙新味時所佳烹煎
雜雞鶩爪距漫槎牙誰知化為蜃海上落飛鴉

脩尾

陸佃埤雅雉之健者為鷩尾長六尺傳曰四足之美有鷹兩足之美有鷩

化為蜃

禮記

月今雉入大水為蜃

落飛鵑

埋雅蜃形如蛇而大蜃氣成樓臺如在烟霧中高鳥倦飛就之以息

氣輒吸之而下俗謂之蜃樓

潁大夫廟

公自注潁考叔也廟在汝州潁橋

人情難強回天性可微感世人爭曲直苦語費搖撼大
夫言何柔暴主意自慘荒祠傍孤冢古隧有殘坎千年
惟茅焦世亦貴其膽不解此微言脫衣徒勇敢

潁廟

太平寰宇記潁大夫廟在許州許昌縣西十里隋大業中重建不言在汝州或汝州別有一廟

未詳

新渠詩并引

庚子正月予過唐州太守趙侯始復三陂疏召渠招
懷遠人散耕于唐予方為旅人不得親執壺漿簞食
以與侯勸逆四方之來者獨為新渠詩五章以告于
道路致侯之意其詞曰

新渠之水其來舒舒溢流于野至于通衢渠成如神民
始不知問誰為之邦君趙侯

唐州

十道志唐州淮安郡秦為南陽郡元和郡縣志秦南陽地後魏太和中置東荊州恭帝時改淮

州開皇中改顯州貞觀九年改唐州北至汝州葉縣一百八十里至許州二百七十里○按太平寰宇記

謂顯德五年分置唐州與地廣記謂貞觀十年改名沿革歲月與元和志俱不同未詳孰是

趙侯

東都事畧趙尚寬字濟之知唐州按視地圖得召信臣故迹發卒復三大陂一大渠溉田萬餘頃又教民自為支渠轉相浸灌四方之民雲集尚寬復請以荒田計口授之貸民官錢置耕牛比三年盡為膏腴之田仁宗聞而嘉之進秩賜金再留民畫像祠之章俊卿山堂考索嘉祐五年三司使包拯言唐州治四縣田之入草萊者十八九知州趙寬興復召信臣渠并境內之陂堰下溉民田數萬頃非獨流民自歸又有淮湖之民至者萬餘戶請留再任從三陂水經注東之○按公過唐州正趙寬再任時也

三陂水經注東

仁陂湖陽陂唐子陂元和郡縣志太
平寰宇記輿地廣記諸書皆失載
召渠輿地記漢

南陽守興水利露宿課耕民呼為召父有召堰在今
唐縣界內荊州圖副湍水作湍在鄧州城北七里有

六門堰擁湍水而成
亦召信臣所作也

新渠之田在渠左右渠來奕奕如赴如湊如雲斯積如
屋斯溜嗟唐之人始識杭稔

新渠之民自淮及潭挈其婦姑或走而顛王命趙侯宥
我新民無與王事以訖七年

侯謂新民爾既來止其歸爾邑告爾鄰里良田千萬爾

擇爾取爾耕爾食遂為爾有

築室于唐孔碩且堅生為唐民飽粥與饘死葬于唐祭
有雞豚天子有命我惟爾安

附王介甫作

離離新田其下流水孰知其初灌莽千里其南背
江其北踰淮父抱子攜十百其來其來僕僕墁我
新屋趙侯劬之歲乃大熟作者不飢飽及鷄鶩就
船與車四鄰出穀今游者處昔止者留維昔牧我

不如今侯侯來適野不有觀者稅于水濱問我鰥
寡侯其來矣三歲于茲誰能止侯我往來之

雙鳧觀

公自注
在葉縣

王喬古仙子時出觀人寰常為漢郎吏厭世去無還雙
鳧偶為戲聊以驚世頑不然神仙迹羅網安能攀紛紛
塵埃中銅印紆青綸安知無隱者竊笑彼愚奸

王喬古仙子

元和郡縣志汝州葉縣後漢書謂之小
長安開元三年于縣置仙州以漢時王

喬于此得仙也太平寰宇記王
子喬壇在緱氏縣東南六里

慎按後漢方術傳王喬河東人為葉令或云
古仙人王子喬也王觀國學林云案左傳稱
太子晉蓋周靈王之太子名晉左傳及史記
不言晉字喬而劉向列仙傳云王子喬者必
太子晉字喬劉向得之他書耳至後漢王喬
者姓王名喬也鄉里氏族仕版皆有定籍而
本傳曰或云即古仙人王子喬是何言耶近
世有王氏神仙傳類聚古今王姓之得仙者

王喬凡三人前漢書王莽傳中有子之皇祖
叔父子儁之語殊不知王子喬乃靈王之子
非姓王也先生詩云云似亦承本傳之譌今
援証於後

附子由作

王喬西飛朝洛陽飄飄千里雙鳬翔鳬飛遭網不
能去惟有空屨鳬已亡誰知野鳥不能化豈必雙
屨能飛揚鳬神屨怪當有在搔首野廟春風長

許州西湖

西湖小雨晴
灩灩春渠長
來從古城角
夜半傳新響
使

君欲春游浚

一作治

役千掌
紛紜具畚鍤
開若蟻運壤
天

桃弄春色生
意寒猶快
惟有落殘梅
標格尚矜
爽游人
全已集挈榼
三且兩醉客
卧道旁扶
起尚偃仰
池臺信
宏麗貴與民
同賞但恐城
市歡不知
田野愴
潁川七不
登野氣長
蒼莽誰知
萬里客
湖上獨長想

許州西湖

元和郡縣志陳許節度使理許州秦潁川郡東魏改南鄭州今州城是也太平寰宇

記河南通忠武軍節度唐同光二年復為許州東北
至東京二百十五里九域志京西北路許州宋升潁
昌府程大昌云神宗初為忠武軍節度後封潁王故
元豐三年升為府石林詩話許昌西湖與子城密相
附云是曲環作鎮時取土築城因以其地導潁水瀦
之廣百餘畝中為橫隄初但有其東之半其西廣于
東增倍而水不甚深宋荅公為守因起黃河春夫浚
治之始與西相通故其詩云鑿開魚鳥忘情地展盡
江湖極目天

阮籍嘯臺

阮生古狂達遁世默無言猶餘胸中氣長嘯獨軒軒高
情遺萬物不與世俗論登臨偶自寫激越蕩乾坤醒為

嘯所發飲為醉所昏誰能與之較亂世足自存

阮籍臺

太平寰宇記阮籍臺在尉氏縣東南二十步籍每追名賢攜酌長嘯登此

大雪獨留尉氏有客入驛呼與飲至醉詰旦客南去竟不知其誰

古驛無人雪滿庭有客冒雪來自北紛紛笠上已盈寸
下馬登堂面蒼黑苦寒有酒不能飲見之何必問相識
我酌徐徐不滿觥看客倒盡不留濕千門晝閉行路絕
相與笑語不知夕醉中不復問姓名上馬忽去橫短策

尉氏

水經注尉氏鄭國之東鄙弊獄官名也鄭大夫尉氏之邑應劭曰尉氏鄭之別獄也太平寰宇

記晉時南阮所居九域志在開封南九十里。尉氏係地名此不待言至應注鄭之別獄按左傳欒盈出奔周西鄙掠之辭於行人曰天子陪臣盈得罪於王之守臣將逃罪重於郊甸無所竄伏敢歸死于尉氏王使司徒禁掠欒氏者云云注尉氏討奸之官是尉氏乃王朝討奸之官非鄭之別獄也應劭注謬又按罪重于郊甸似尉氏亦周之郊甸與鄭東鄙無涉

慎按諸刻本此題止大雪獨留尉氏六字今

從外集采錄全題

黃河

活活何人見混茫崑崙氣脉本來黃濁流若鮮污清濟
驚浪應須動太行帝假一源神禹蹟世流三患梗堯鄉
靈槎果有仙家事試問青天路短長

崑崙

爾雅河出崑崙墟色白所并渠千七百一川色黃王肅云崑崙在臨羌西水經崑崙虛在西北

去嵩高五萬里地之中也註引外國圖云從大晉國正西七萬里得崑崙之墟釋宗泐全室外集云河源出抹必力巴赤山番人呼黃河為林處麓牛河為必力處巴赤者分界也其山西南所出之水是謂河源東抵崑崙七八百里今所涉處尚三百餘里下與崑崙之水合流中國相傳謂源出崑崙非也崑崙名麻珠刺其山最為高大四時常雪番書載其境內祭祀之山有九此其一也

三患梗堯鄉

莊子

華封人謂堯曰天下有道則與物皆昌無道則修德就閒千載厭世去而上仙乘彼白雲歸于帝鄉三患莫至身常無殃何辱之有

朱亥墓

公自注俗謂屠兒原

昔日朱公子雄豪不可追今來游故國大塚屈稱兒平日輕公相千金棄若遺梁人不好事名姓寄當時魯史盜齊豹求名誰復知慎無怨世俗猶不遭仲尼

朱亥墓

朱亥事詳史記信陵君傳太平寰宇記朱亥墓在封邱縣西三十里李濂汴京遺蹟志云

朱亥墓在開封西南朱仙鎮未詳孰是

慎按信陵既誘竊兵符復使亥椎殺晉鄙而奪其軍
所報者私恩所負者大義史遷不美晉鄙之死節而
多朱亥之豪俠取予似乎失當故公詩意謂以春秋
之義責之則必曰盜殺晉鄙矣幸而不遭孔子獲免
盜名然則世俗呼為
屠兒猶未為辱也

次韻水官詩

并引

淨因大覺璉師以閭立本畫水官遺編禮公公既報
之以詩謂某汝亦作某頓首再拜次韻仍錄二詩為
一卷獻之

高人豈學畫用筆乃其天譬如善游人一一能操船閭

子本縫掖疇昔慕雲淵丹青偶為戲染指初嘗鼃愛之
不自已筆勢如風翻傳聞貞觀中左袵解椎髻南夷羞
白雉佛國貢青蓮詔令擬王會別殿寫戎蠻熊冠金絡
額豹袖擁旛纛傳入應門內俯伏脫劔拳天姿儼龍鳳
雜沓朝鵬鱣神功與絕迹後世兩莫扳自從李氏亡羣
盜竊山川長安三日火至寶隨飛烟尚有脫身者漂流
出東一作東出關三官豈容獨得此今已編吁嗟至神物會
合當有年京城諸權貴欲取百計難贈以玉如意豈能動

高禪信應一篇詩皎若畫在前

淨因

五燈會元汴京自周毀寺太祖建隆間復興兩街止是南山律部慈恩賢首抄疏義學而已天

台止觀達摩禪宗未行也皇祐中內侍李允寧始施汴宅一區與禪席賜額十方淨因院

大覺

璉師

僧寶傳仁宗皇祐中初創淨因院止有道德者住持歐陽修陳師孟奏請廬山居訥訥稱目疾不

起聽舉自代乃以懷璉應詔禪林寶訓明州育王寺懷璉禪師字器之漳州陳氏子嗣泐潭懷澄青原下

十四世宋仁宗皇祐二年詔住京師十方淨因院賜號大覺禪師

閣立本

唐朝名畫錄立本位

居宰職與兄立德齊名廣川畫跋云立本顯慶初為工部尚書總章元年拜左相封博陵縣公有應務之才兼工畫號編禮宋史蘇洵傳嘉祐間除秘書省校書為丹青神化

安主簿與項城令姚闢同編纂為太常因革禮一百卷

雲淵

漢書終軍字子雲王褒字子淵二人

合傳故先生並稱之非揚子雲也

擬王會

洪景廬云汲冢周書七十篇所載事物多過實王會

篇皆大會諸侯及四夷事所記四夷國名頗古奧獸畜亦奇崛唐太宗時遠方諸國來朝貢者甚衆服裝詭異顏師古請圖以示後作王會圖蓋取諸此

附老蘓原作

此詩嘉祐集失載今從王注采出錄

水官騎蒼龍龍行欲上天手攀時且住浩若乘風
船不知幾何長足尾猶在淵下有二從臣左右乘
魚龜雙鑠相顧視風舉衣袂翻女子侍君側白頰

垂雙鬟手執雉尾扇容如未開蓮從者八九人非
鬼非戎蠻出水未成列先登揚旗擅長刀擁旁牌
白羽注强拳雖服甲與裳狀貌猶鯨鱣水獸不得
從仰面以手扳空虛走雷霆雨電晦九川風師黑
虎囊面目昏塵烟翼從三神人萬里朝天闕我從
大覺師得此鬼怪編畫者古閩子于今三百年見
者誰不愛予者誠已難在我猶在子此理寧非禪
報之以好詞何必畫在前

蘇詩補註卷二

欽定四庫全書

蘇詩補註卷三

翰林院編修查慎行撰

古今體詩五十二首

起嘉祐六年辛丑十一月後
赴鳳翔任合明年壬寅作

慎按嘉祐五年庚子先生授河南福昌主簿
未赴而以歐陽公薦召試秘閣復應制科入
三等明年十一月除大理評事簽書鳳翔判
官十二月到任時陳希亮為府帥以屬禮待
之或謂人不得見先生壯年盛氣不肯相下

所作凌虛臺記及客位假寐詩不平之語時
一發露烏臺詩案中有任簽判日為中元節
假不赴知府廳罰銅八斤亦希亮任內事也
施氏原本移客位假寐一首入倅杭時蓋訛
以公弼為述古耳今據邵博聞見後錄改正
又和子由除夕見寄五古一首和子由聞余
善射七律一首皆在鳳翔時作施氏本缺今
補八卷中

辛丑十一月十九日既與子由別於鄭州西門之
外馬上賦詩一篇寄之

不飲胡為醉兀兀此心已逐歸鞍發歸人猶自念庭闈
今我何以慰寂寞登高回首坡壠隔但見烏帽出復沒
苦寒念爾衣裘薄獨騎瘦馬踏殘月路人行歌居人樂
童僕怪我苦悽惻亦知人生要有別但恐歲月去飄忽
寒燈相對記疇昔夜雨何時聽蕭瑟君知此意不可忘

慎勿苦愛高官職

公自注嘗有夜雨
對牀之言故云爾

辛丑

仁宗嘉祐六年

鄭州

元和郡縣志春秋鄭國晉置滎陽郡開皇三年改鄭州貞觀七年自

武牢移于今理東至東京一百四十里九域志屬京東北路宋為奉寧軍節度

念庭闈

遺老

傳輒年二十三舉直言是時先君被命修禮書而兄子瞻出簽書鳳翔判官旁無侍子因奏乞養親。按許彥周詩話云詩云燕燕于飛差池其羽之子于歸遠送于野瞻望弗及泣涕如雨此詞可泣鬼神矣東坡送子由詩登高回首陂隴隔但見烏帽出復沒乃遠紹其意

和子由澠池懷舊

人生到處知何似應似飛鴻踏雪泥泥上偶然留指爪
鴻飛那復計東西老僧已死成新塔壞壁無由見

一作
覓

舊題往日崎嶇還記石路長人困蹇驢嘶

公自注往歲馬死于二陵

騎驢至
澠池

澠池

太平寰宇記即秦趙相會之地在河南府西城與澠池水源南北相對許氏說文澠似蛙而大

池內產此故名與地廣記澠池有東西俱利二城元魏置澠池郡今為縣元和郡縣志廣陽山亦名澠池

山在縣東北自澠池東至河南府一百五十里

飛鴻留爪

傳燈錄天衣懷義禪師云雁過長空

影沉寒水雁無遺跡之意水無留影之心若能如是方解向異類中行先生此詩前四句暗用此語

僧

字奉閑子由詩注云昔與子瞻應舉過宿縣中寺舍題老僧奉閑之壁

附子由原作

相攜話別鄭原上共道長途怕雪泥歸騎還尋大

梁陌行人已度古嶠西曾為縣吏民知否

輟曾為此縣簿

未赴而中第

舊宿僧房壁共題遙想獨遊佳味少無言

驢馬但鳴嘶

次韻和劉京兆石林亭之作石本唐苑中物散流

民間劉購得之

都城日荒廢往事不可還惟餘古苑石漂散向

一作尚

人間

公來始購蓄不憚道里艱忽從塵埃中來對冰雪顏瘦

骨拔凜凜蒼根漱潺湲唐人惟奇章好石古莫攀盡令
屬牛氏刻鑿紛斑斑嗟此本何常聚散實循環人失亦
人得要不出區寰君看劉李未能保河關況此百株
石鴻毛於太山但當對石飲萬事付等閒

都城

文獻通考京兆府周之舊都凡周秦漢晉西魏後周隋至於唐並為帝都劉京兆

東都

事畧劉敞字原父袁州臨江人進士甲科在長安得古器數十愛其款識文字奇古因以考知三代制度與先儒所說不同者六一題跋嘉祐中原父以翰林學士出為永興軍路安撫使其治在長安原父博學好古多藏古奇器物能讀古文銘識而長安秦漢故都時時發掘所得原父悉購而藏之鐵圖山叢談劉

原父出守長安其地多古簋敦鏡甌尊彛之屬因自
著一書號先秦古器記太平寰宇記關西道京兆郡
漢乾祐初改永興軍其京兆府仍舊宋因之
東至西京八百五十里西至鳳翔三百十里
石林亭
王象之碑目石林亭在麟游縣治
東劉敞有詩蘇軾和石刻尚存
奇章好古
詳見白居易太

湖石記

附劉原父石林亭原作

此詩從麟游縣志采出

朝廷入忘返山林往不還念無高世資聊處可否
間築基傲崔巍鞭石輕險艱羣玉相磊落萬峯正
孱顏種樹亦蒼蒼激流復潺潺湍湍在眼崑閬

若可攀自我攫世網爾來鬢毛斑丘壑誠若喪簿
書常自環及爾滅聞見曠若遠塵寰豈願同避世
庶幾善閉關子牟固懷魏謝傳悲徂山茲焉可娛
老詎厭終歲閒

和劉長安題薛周逸老亭周善飲酒未七十而致仕
近聞薛公子早退驚常流買園招野鶴鑿井動潛蚪自
言酒中趣一斗勝涼州翻然拂衣去親愛挽不留隱居
亦何樂素志庶可求所亡嗟無幾所得不啻酬青春為

君好白日為君悠山鳥奏琴筑野花弄閒幽雖辭功與
名其樂實素侯至今清夜夢尚驚冠壓頭誰能載美酒
往以大白浮之子雖不識因公可與遊

慎按薛周爵里莫考此詩因前篇而附錄

附子由次韻

飛鳥不知穴山鹿不知流薛子善飲酒口如吸水
虬吾聞腸胃間何異族黨州人滿地已盡一芥不
可留謂子試飲水一酌不再求謂子飲醇酒百醕

豈待酬酒可水不可其說亦繆悠以我視夫子胸
腹百丈幽譬如田中人視彼公與侯未省破顏飲
何況裸露頭鵝夸謂大瓢皆飽安用浮多少苟自
適豈害為朋遊

驪山三絕句

功成雖欲善持盈可歎前王恃太平辛苦驪山山下土

阿房纔廢又華清

首句雖字疑訛當作惟

驪山

程大昌雍錄驪山周為驪戎國即藍田山也與地廣記天寶元年更名會昌山太平寰宇記驪

山在昭應縣東南二里溫泉出其下三秦記始皇作
關道至驪山八十里人行橋上車行橋下今石柱猶

存
阿房

元和郡縣志阿房宮在萬年縣西北十四里
太平寰宇記始皇築阿房宮十五年始成以

在山阿之
旁故名

華清

雍錄華清宮開元十年建初名溫泉
宮後改華清宮在驪山最為奢盛百

司皆有邸第玄宗嘗以十月往幸歲竟乃歸宋朝事
實類苑故宮在驪嶺之下今溫泉觀是也宋敏求長
安志四面皆有繚牆內有
朝元閣長生殿羯鼓樓

幾變雕牆幾變仄舉烽指鹿事悠悠上皇不念前車戒

却怨驪山是禍胎

海中方士覓三山萬古明知去不還咫尺秦陵是商鑒

朝元何必苦躋攀

秦陵

元和郡縣志始皇陵在萬年縣東八里始皇即位治驪山陵役徒七十萬人蓋驪山水源本北

流者陂障使東西流又此土無石取大石於渭北其費功力如此

朝元

長安志朝元閣在華清宮

東南老君殿之北天寶七載老君見於朝元閣改名降聖閣江少虞事實類苑繡嶺山半有玉蓋峯所謂朝元閣者峯側有夾柱作王母之像其御階甃以蓮花磚千條次一石柱柱端有孔相傳云天寶中貫以紅綿組官女攀援而上天聖末尚在至慶歷中王母像已失石柱亦為道士燒為灰矣

和子由岐下詩

並引○藥城集缺原作

予既至岐下逾月於其解宇之北隙地為亭亭前為

橫池長三丈池上為短牆屬之堂分堂之北屢為軒
窗曲檻俯瞰池上出堂而南為過廊以屬之廳廊之
兩旁各為一小池皆引沂水種蓮養魚於其中池邊
有桃李杏梨棗櫻桃石榴檮槐松檜柳三十餘株又
以斗酒易牡丹一叢於亭之北子由以詩見寄次韻
和答凡二十一首

北亭

誰人築短牆橫絕擁吾堂不作新亭檻幽花誰為香

自公

注舊堂北有牆
子始去之為亭

橫池

明月入我池皎皎鋪紵縞何日變成緇太玄吾嬾草

短橋

誰能鋪白簟永日臥朱橋樹影欄邊轉波光版底搖

軒窗

東隣多白楊夜作雨聲急窗下獨無眠秋蟲見燈入

曲欄

流水照朱欄青紅亂明鑑誰見檻上人無言觀物泛

雙池

汧流入城郭疊疊渡千家不見雙池水長漂十里花

荷花

田田抗朝陽節節卧春水平鋪亂萍葉屢動報魚子

魚

湖上移魚子初生不畏人自從識釣餌欲見更無因

牡丹

花好常患稀花多信佳否未有四十枝枝枝大如斗自公

注牡丹花有四十餘枝

桃花

爭開不待葉密綴欲無條傍沼人窺鑑驚魚水濺橋

李

不及梨英軟應慚梅萼紅西園有千葉淡佇更纖穠自公

注城西有千葉李如茶蘼

杏

開花送餘寒結子及新火關中幸無梅汝彊充鼎和自

注關中地
不生梅

關中

宋中興四朝志潘岳以為秦在隴函二關之間是為關中然鳳州之散關隴西之隴關商州之

武關原州之蕭關藍田之峽關其名皆先秦而出則凡地在四關之內皆當繫關以為名也

梨

霜降紅梨熟柔柯已不勝未嘗蠲夏渴長見助春冰

紅梨

杜甫詩紅梨迥得霜

棗

居人幾番老棗樹未成槎汝長才堪軸吾歸已及瓜

自公

注棗樹
至難長

櫻桃

獨遶櫻桃樹酒醒喉肺乾
莫除枝上露從向口中薄

石榴

風流意不盡獨自送殘芳
色作裙腰染名隨酒盞狂

自公

注酒名
有石榴

榑

自昔為神樹空間蜩鳴鳴社公煩見輟為爾致羊羹自

注舊為土地廟所
蔽余始遷廟牆北

槐

采擷殊未厭忽然已成陰蟬鳴看不見鶴立赴還深自

注上有野
鶴三四

松

按此首
疑是檜

強致南山樹來經渭水灘生成未有意鴉鵲莫相干

檜

按此首
疑是松

依依古松子鬱鬱綠毛身每長須成節明年漸庇人

柳

今年手自栽問我何年去他年我復來搖落傷人意

慎按以上二十一首所紀非一時事因詩引
中有至岐下逾月之語故類編辛丑卷中又
按樂城集無寄東坡原作無從采附

和子由除日見寄

薄官驅我西遠別不容惜方愁後會遠未暇憂歲夕強

歡雖有酒冷酌不成席秦烹惟羊羹隴饌有熊腊念為
兒童歲屈指已成昔往事今何追忽若箭已釋感時嗟
事變所得不償失府卒來驅儻矍鑠驚遠客愁來豈有
魔煩汝為攘磔寒梅與凍杏嫩萼初似麥攀條為惆悵
玉蕊何時折不憂春艷晚行見棄夏覈人生行樂耳安
用聲名籍胡為獨多感不見膏自炙詩來苦相寬子意
遠可射依依見其面疑子在咫尺兄今雖小官幸忝佐
方伯北池近所鑿中有汧水碧臨池飲美酒尚可消永

日但恐詩力弱闕健未免馘詩成十日到誰謂千里隔
一月寄一篇憂愁何足擲

薄官

史記鄭當時傳年少官薄然其同游

攘礫

月令季春

命國讎九門礫攘以畢春氣鄭氏注云礫

夏覈

周禮其植

物宜覈物鄭氏注通作核謂李梅之

汧水

爾雅水決之澤為汧

屬陳平傳亦食糠覈耳又與乾同
水經注渭水過陳倉縣汧水入焉水出汧縣之蒲谷
鄉弦中谷有二源一出縣西山世謂之小隴山其一
發源南山西側俗以此山為吳山古之汧山也自水
會上下咸謂之魚龍川元和郡縣志五水俱在鳳翔
謂汧渭岐
雍漆也

慎按樂城集原題云辛丑除日寄子瞻先生
和章亦應編本年之末施氏原本失載今從
續補卷中移編於此

附子由作

一歲不復居一日安足惜人心畏增年對酒語終
夕夜長書室幽燈燭明照席盤餐雜梁楚羊炙錯
魚腊庖人饌雞兔家味宛如昔有懷岐山下展轉
不能釋念同去閭里此節三已失初來寄荆渚魚

雁賤宜客楚人重歲時爆竹鳴磔磔新春始涉五
田凍未生麥相攜歷唐許花柳漸牙拆居梁不耐
貧投杞避糠覈城南庠齋靜終歲守墳籍酒酸未
嘗飲牛美每共炙謂言從明年此會可懸射同為
洛中吏相去不盈尺濁醪幸分季新筍可餉伯嶢
嶢嵩山美漾漾洛水碧官閒得相從春野玩朝日
安知書閣下羣子並遭馘偶成一朝榮遂使千里
隔何年相會歡逢節勿輕擲

壬寅二月有詔令郡吏分往屬縣減決囚禁自十
三日受命出府至寶雞號郿盤屋四縣既畢事因
朝謁太平宮而宿於南谿谿堂遂並南山而西至
樓觀大秦寺延生觀仙遊潭十九日乃歸作詩五
百言以記凡所經歷者寄子由

遠人罹水旱王命釋俘囚分縣傳明詔尋山得勝游蕭
條初出郭曠蕩實消憂薄暮來孤鎮登臨憶武侯崢嶸
依絕壁蒼茫瞰奔流半夜人呼急橫空火氣浮天遙殊

不辨風急已難收晚入陳倉縣猶餘賣酒樓烟煤已狼

籍吏卒尚呀咻

公自注十三日宿武城鎮即俗所謂石鼻寨也云孔明所築是夜二鼓實鷄火

作相去三十里而見於武城

雞嶺雲霞古龍宮殿宇幽

公自注縣有雞爪峯龍宮

寺南山連大散歸客走吾州欲往安能遂將歸為少留

回趨西號道却渡小河洲聞道礮谿石猶存渭水頭蒼

崖雖有迹大釣本無鉤

公自注十四日自寶雞行至號關太公磻谿石在縣東十八里

猶有投竿跪餌兩膝所著之處

東去過郿塢孤城象漢劉

公自注十五日自郿縣縣

有董卓城象長安俗謂之小長安

誰言董公健竟復伍字仇白刃俄生

肘黃金謾似丘平生聞太白一見駐行騶鼓角誰能試

風雷果致不巖崖已奇絕冰雪更瑯鏤春早憂無麥山

靈喜有湫蛟龍嬾方睡餅罐小容偷

公自注是日晚自郿起至青秋鎮宿

道過太白山相傳云軍行鳴鼓角過山下輒致雷雨山上有湫甚靈以今歲早方識取之

二曲林泉

勝三川氣象侔近山薶麥早臨水竹簟修

公自注十六日至盤屋以

近山地美氣候殊早驟有官竹園十數里不絕

先帝膺符命行宮畫冕旒侍臣

簪武弁女樂抱笙篴秘殿開金鎖神人控玉蚪黑衣橫

巨劍被髮凜雙眸

公自注十七日寒食自盤屋東南行二十餘里朝謁太平宮二聖御容此

官乃太宗皇帝時有神降於道士張守真以
告受命之符所為立也神封翊聖將軍有殿
邂逅逢佳

士相將弄彩舟投篙披綠荇濯足亂清溝晚宿南谿上

森如水國秋遶湖栽翠密終夜響颼颼

公自注是日與
監宮張杲之泛

舟南溪遂留
宿於溪堂

冒曉窮幽邃操戈畏炳彪

公自注十八日
猶終南而西縣

尉以甲卒見送或云
近官竹園往往有虎

尹生猶有宅老氏舊停輶問道遺

踪在登仙往事悠馭

一作御

風歸汗漫閱世似蜉蝣羽客

知人意瑤琴繫馬鞦不辭山寺遠來作鹿鳴吻帝子傳

聞李宮堂髣髴像輕風幃幔卷落日髻鬟愁入谷

音驚

蒙密登坡費挽樓亂峯攢似梨一水澹如油中使何年到金龍自古投千重橫翠石百丈見游鯨最愛泉鳴洞

初嘗雪入喉滿瓶雖可致洗耳歎無由

公自注是日游崇聖觀俗所謂

樓觀也乃尹喜舊宅山脚有授經臺尚在遂與張果之同至大秦寺早食而別有太平宮道士趙宗有抱琴見送至寺作鹿鳴之引乃去又西至延生觀觀後上小山有唐玉真公主修道之遺跡下山而西行十數里南入黑水谷谷中有潭名仙遊潭潭上有寺三倚峻峰面清溪樹林深翠怪石不可勝數潭水以繩絙石數百尺不得其底以瓦礫投之翔揚徐下食頃乃不見其清激如此遂宿於中興寺寺中有玉女洞洞中有飛泉甚甘明日以泉二瓶歸至郡又明日乃至府忽憶尋蟻培方冬脫鹿裘山川良甚

似水石亦堪儔惟有泉旁飲無人自獻酬

公自注昔與子由游蟆培

時方冬洞中溫
溫如二三月

壬寅

仁宗嘉祐七年

四縣

九域志秦鳳路鳳翔府領縣十寶雞號郿盤屋其四也太平寰宇記

寶雞在府西南九十里號縣在府南四十里郿縣在府東南一百里盤屋縣在府東南二百里按寶雞屬二縣今屬鳳翔府號縣地今併入岐山縣盤屋縣今屬西安府

孤鎮

九域志武城鎮屬寶雞縣郭允

蹈蜀鑑陳倉有上下二城上城秦文公築下城是郝昭築

蒼茫

陳鵠耆舊續聞李嘉祐詩門臨蒼茫

經年閉身逐嫫姚幾日歸又張祐詩洛水暮天橫蒼茫印山落日露崔嵬東坡詩崢嶸依絕壁蒼茫瞰奔流蒼茫二字古人用之

陳倉縣

水經渭水又東過陳倉縣西鄜道元注縣

有陳倉山山上有寶雞祠昔秦文公於此坂得若石焉其色如肝歸而寶祠之故曰陳寶元和郡縣志陳

倉縣在渭水北九域志引三秦記曰秦武公都雍陳倉是也國學紀聞陳倉在唐為鳳翔府寶雞縣賣

酒樓

名勝志寶雞城內有酒樓自唐至宋城邑屢更兵火獨此樓尚存南山五經要

南長安南山也長安志終南山在長安城西南五十里雍錄終南橫亘關中南面西起秦隴東徹藍田凡雍岐郿鄠長安萬年相去且八百大散雍錄大散關

里連綿峙踞其南者皆此一山也大散在漢中府西南太平寰宇記在寶雞縣西南五十二里通褒斜之

大道宋中興四朝志大散關隸興泉縣為秦蜀往來要道兩山斗絕出可以攻入西號水經注雍縣秦德

可以守實表裏之形勝也西號公所居漢書地理志以為西號縣文獻通考西號在今鳳翔縣太平御覽引帝王世紀曰號有三焉周封號仲於西號此其

地磻溪石

水經注渭水之右磻溪水注之水出南山

也磻溪石溪中有泉謂之茲泉即呂氏春秋所云太

公釣茲泉也今人謂之凡谷林障秀阻人跡罕交東

西隅有石水流次於石即太公垂釣之所兩膝遺跡

猶存是有磻溪之稱太平寰宇記號縣派城象漢劉

有磻溪其水清冷北流十二里注於渭

水經注引漢獻帝傳曰董卓發卒築郿塢高與長安

城等太平寰宇記董卓塢在郿縣東北十六里卓封

郿侯据北阜築塢高七太白水經注引地里志曰太

洞天太白山名玄德之天在明州與此青秋鎮九域志郡

縣有青秋橫渠注詳後第五鷹符命曾鞏隆

神降於終南山道士劉守真以為天下之宗神號黑

殺將軍守真每齋戒祈請必至聲如嬰兒獨守真能

晚開寶九年太祖不豫驛召守真問焉曰上天宮闕

成玉鎖開矣晉王有人心言訖不復降太平興國六

年詔築上清太平宮於終南山下邵博聞見後錄神

降於鳳翔盤屋縣民張守真家守真遂為道士其他

所紀與隆平集同惟道士之姓互容齋隨筆劉

異合之公自注當以張守真為是昭釋名莖篴

空國之侯所作樂府錄云莖篴乃鄭衛之音以其亡

國之音故號空國之侯亦曰坎侯吳兢解題云漢武

依瑟造坎侯訛為莖篴按封禪書武帝召歌兒作二

十五絃及莖篴應劭注云帝令樂人候調始造此器

前漢郊祀志備書此事言空侯自此始劉吳雖博洽亦不深究且空非國名其說尤穿鑿也初學記太平御覽編載樂事皆缺而不書續帝子宋玉九歌帝子漢紀云靈帝作笙篴亦非也

帝子

宋玉九歌帝子降於北渚注云

堯二女公詩借以言玉真公主也○按唐景雲元年睿宗第九女昌隆公主出家為女冠二年改封玉真長安輔興坊東南有玉真觀今先生自注云延生觀後小山有公主遺跡或後人於此別立道院耳金龍周昭禮清波雜志天下名山洞府朝廷每歲投龍簡天聖中下道錄院定歲投龍簡二十處

附子由次韻

山川足清曠闕闕巧拘囚安得繼阿御同為穆滿
遊遙知因汗漫遠出散幽憂原隰繁分繡村墟盡

小侯春深秦樹綠野濶渭河流四顧神蕭瑟前探
意漲浮勝觀殊未已往足詎能收下坂如浮舸登
崖劇上樓強行腰偃僂困坐氣噓咻鳥語林巒靜
花明澗谷幽濯溪驚野老伐路駭他州中散探深
去文淵到處留聽琴峯下寺弄石水中洲溪冷泉
冰脚山高霧遶頭石潭清照骨瀑水濺成鈎仙廟
鳴鐘磬神官秉鉞劉養生聞帝女服氣絕彭仇故
宅猶傳尹先師不喜丘居人那識道過客漫停騶

巖谷誠深絕神仙信有不雲居無几杖霞珮棄鐫
鏤豹隱連山霧龍潛百尺湫門開誰與叩桃熟浪
傳偷紺髮清無比方瞳凜不侔會須林下見乞取
壽年修拔去和雞犬相隨若旆旒乘風遺驪褭長
嘯賤笙篴從騎衣皆羽前驅鬣盡蚪安能牽兩足
暫得快雙眸自昔辭鄉樹南行上楚舟萬江窮地
脈三峽束天溝雲暗鄖都晚波吹木樨秋尋溪緣
窈窕入洞聽颼颼空寺收黃栗荒祠畫伏彪登臨

雖永日行邁肯停輶蓄縮今何事攀躋昔已悠
魏京饒士女春服聚蜉蝣雷動車爭陌花搖樹繫鞦
遊人紛蕩漾野鳥自嚶呦平日曾經洛閒居願卜
緱空言真比夢久渴漸成愁早退嘗相約辭囂痛
自樓愛山心刼刼從宦興油油海宇都無礙山林
盡可投願為雲上鵠莫作盎中鯀適性行隨足謀
生富給喉今遊雖不與後會豈無由畫出同穿履
宵眠共覆裘弟兄真欲爾朋好定誰儔試寫長篇

調何人肯見酬

太白山下早行至橫渠鎮書崇壽院壁

馬上續殘夢不知朝日昇
亂山橫翠幃落月澹孤燈
奔走煩郵吏安閒愧老僧
再遊應眷眷聊亦寄吾曾

橫渠鎮

九域志郿縣有橫渠鎮

崇壽院

一統志崇壽院在郿縣東五十里橫渠鎮南

附子由次韻

山下晨光晚林梢露滴昇
峯頭斜見月野寺早明
燈樹暗猶藏鵲堂開已饒
僧據鞍應夢我聯騎昔

嘗曾

留題延生觀後山上小堂

溪山愈好意無厭
上到巉巉第幾尖
深谷野禽毛羽怪
上方仙子鬢眉纖
不慙弄玉騎丹鳳
應逐嫦娥駕老蟾
澗草巖花自無主
晚來蝴蝶入疎簾

延生觀後小堂

錦繡萬花谷唐景雲元年睿宗第九女昌隆公主出家為女冠二年改封

玉真長安輔興坊東南有玉真觀今云延生觀後山上小堂有公主遺跡宜乎後人為之立堂矣本朝端拱元年十月

上方仙子

即唐玉真公主也詳本卷
壬寅二月詩公自注中矣

奉勅賜額

附子由次韻

謝公遊意未能厭踏盡登山屐齒尖古殿神仙深
杳杳香爐烟翠起纖纖巖花寂歷飄瓊片庭桂蕭
疎漏玉蟾帝子暮歸人不見微風細雨自開簾
留題仙遊潭中興寺東有玉女洞洞南有馬融讀
書石室過潭而南山石益奇潭上有橋畏其險不
敢渡

清潭百尺皎無泥山木陰陰谷鳥啼蜀客曾遊明月峽

秦人今在武陵溪獨攀書室窺巖竇還訪仙姝歛石閨
猶有愛山心未至不將雙腳踏飛梯

仙遊潭

在黑水谷詳見壬寅二月詩公自注中

玉女洞

太平寰宇記寶雞縣有玉女洞

秦穆公女弄玉鳳臺之地也麟遊縣志玉女潭在縣南二十里魚塘峽內其水自永安宮前流入此潭從

半山飛下聲振巖谷舊志謂有仙浴此名書室

元和郡縣

勝志唐武后避暑九成宮時浴此因賜名

志馬融讀書臺在盤明月峽太平寰宇記明月峽在利州綿谷縣界又云渝

州巴縣東華陽國志巴郡

江州縣有明月峽即此

慎按章子厚為商洛令與東坡同遊南山抵仙遊潭潭下臨絕壁橫木其上子厚揖東坡書壁不敢子厚

平步過之握筆大書乃還東坡拊其肩曰君他日必
能殺人此段載施氏原注送章七出守湖州詩下新
刻刪去今移附於
此可為末句注脚

附子由次韻

潭邊沙水不成泥潭上孤禽挂嶮啼繚繞飛橋能
試客蒙茸翠蔓巧藏溪雲為絳帳馬融室石作屏
風玉女閨仙果知君今未足臨潭脚戰怕長梯
石鼻城

平時戰國今無在陌上征夫自不閒北客初來試新險

蜀人從此送殘山獨穿暗月朦朧裏愁渡奔河蒼茫間
漸入西南風景變道邊修竹水潺潺

石鼻

即武成鎮詳見壬寅二月詩公自注中

戰國

水經注魏明帝遣太原郝昭營陳倉城諸

葛亮圍之不下今瀟水對亮城是與昭相禦處也

附子由作

千山欲盡垂為鼻百戰皆空但有城虎闖穴中秦
地恐龍飛渭上漢江傾雍人未有章邯怨魏將猶
存仲達精睥睨陵遲春草滿白羊無數向風鳴

礪溪石

墨突不暇黔孔席未嘗煖安知渭上叟跪石留雙胛一朝嬰世故辛苦平多難亦欲就安眠旅人譏客懶

附子由和

吕公年已暮擇主渭河邊跼餌留雙膝臨溪不計年神專能陷石心大豈營鱸不到礪溪上安知自守堅

郿塢

衣中甲厚行何懼塢裏金多退足憑畢竟英雄誰得似
臍脂自照不須燈

郿塢

後漢書董卓傳塢高厚七丈注云今按塢舊基高一丈周圍一里一百步

衣中甲厚

董卓傳王允與士孫瑞密表其事自書詔以授呂布
今李肅與布于北掖門內待卓入門肅以戟刺之衷
甲不入傷臂墮塢裏金多董卓傳築塢于郿積穀為
車趣兵斬之三十年儲自云事成雄據
天下不成守此足以畢老塢中
珍藏有金三萬斤銀八九萬斤

附子由和

董公平日甚縱橫晚歲藏金欲避兵當日英雄智

相似燕南趙北亦為京

樓觀

公自注秦始皇立老子廟于觀南晉惠始修此觀

門前古碣卧斜陽閱世如流事可傷長有幽人悲晉惠
強修遺廟學秦王丹砂久害井水赤白木誰燒厨竈香
聞道神仙亦相過只疑田叟是庚桑

樓觀

元和郡縣志樓觀在盤屋縣東三十七里本周康王大夫尹喜宅也相承至秦漢皆有道士居

之晉惠帝時重置者其地舊為尹先生樓錦繡萬花谷引樓觀記云周穆王尚神仙因尹真人草樓之觀遂名幽逸之人置為道士雲笈七籤樓觀在京北府盤屋縣神獸鄉聞仙里華陽錄記云始皇好神仙于

尹先生樓前立老君廟晉元康中重修
蔣木萬株連亘七里給灑掃戶三百
古碣雲笈七

遇老君得道穆王為建祠修觀召幽逸之人置為道士
故樓觀碑云昔周康王時大夫闕令尹喜所立也

閱世陸機歎逝賦川閱水而成川水滔滔而丹砂井

抱朴子載臨沅縣廖氏事補注作臨沅訛

附子由和

老聃厭世入流沙飄蕩如雲不可遮弟子憐師將
去國關門望氣載還家高臺尚有傳經處畫壁空
留駕犢車一授遺書無復老不知何苦服胡麻

寶雞縣斯飛閣

西南歸路遠蕭條倚檻魂飛不可招
野濶牛羊同雁鶩
天長草樹接雲霄
昏昏水氣浮山麓
汎汎春風弄麥苗
誰使愛官輕去國
此身無計老漁樵

寶雞

舊陳倉縣唐改名寶雞詳注前陳倉下

斯飛閣

寶雞縣志斯飛閣在縣治西南

壬寅重九不預會獨遊普門寺僧閣有懷子由

花開

一作門

酒美盍不

一作言

歸

石刻作曷不醉

來看南山冷翠微

憶弟淚如雲不散望鄉心與雁南飛
明年縱健人應老

昨日追歡意正

石刻作已

遠不問

石刻作向

秋風強吹帽秦人不

笑楚人讖

慎按石刻題云壬寅重九以不與府會故獨游至此有懷舍弟子由

晉門寺

鳳翔府志晉門寺在

東門外唐建金大定六年重修

客位假寐

公自注因謁鳳翔府守陳公弼

謁人不得去兀坐如枯株豈惟主忘客今我亦忘吾同
僚不解事愠色見髯須雖無性命憂且復忍須臾

慎按斯飛閣重九不預會二首施氏原本俱

不載客位假寐一首訛載杭州卷中今以時
地考之其為鳳翔作無可疑者故類編於此
史稱公弼清勁寡欲平生不假人以色其守
鳳翔時年且老矣邵氏聞見後錄謂公弼在
府東坡初擢制科吏呼蘇賢良公弼曰府判
何賢良也杖其吏不顧或謁入不得見故東
坡客位假寐詩云云其不堪如此後公弼受
他州餽酒從贓坐沮辱抑鬱抵于死或云歐

陽公憾于公弼有曲折東坡不但望公弼相遇之薄也公弼子季常居黃州元豐初東坡謫黃者執政疑公弼廢死由東坡委于季常甘心焉然二人相得甚歡故東坡為公弼作傳有軾官鳳翔相從二年方是時少年盛氣屢與公爭議至形于言色已而悔之等語愚謂兩先生皆賢者當官意氣一時偶不相下容或有之若謂東坡因此修怨致公弼放廢

以歿此事所必無者使誠有之則季常又豈
忘親狗友者邵氏之說未可盡信也

九月二十日微雪懷子由弟二首

岐陽九月天微雪已作蕭條歲暮心短日送寒砧杵急
冷官無事屋廬深愁腸別後能消酒白髮秋來已上簪
近買貂裘堪出塞忽思垂傳問西琛

岐陽

元和郡縣志岐陽縣漢杜陽地唐割扶風岐山二縣置以在岐山之陽也文獻通考秦內史地

漢為右扶風後魏置岐州西魏改為岐陽郡唐鳳翔府

江上同舟詩滿篋鄭西分馬涕垂膺未成報國慚書劍
豈不懷歸畏友朋官舍度秋驚歲晚寺樓見雪與誰登
遙知讀易東窗下車馬敲門定不應

江上同舟

江上值雪詩
見第一卷

讀易

蘇籀雙溪集載子由言
先君晚歲讀易玩其文

象以觀其辭皆迎刃而解又云作易傳未完命二子
述其志初二公少年皆為易說既而東坡成書公乃
送所解與坡今蒙卦獨
是公解籀子由之孫也

附子由次韻

秋氣蕭騷仍見雪客愁繚繞動縈心幽吟北戶窗

聲細歸夢函關馬跡深疎樹飛花輕較較衰荷留
柄亂簪簪遙聞詩酒皆推勝社客何人近納琛
平時出處常聯袂文翰叨陪舊服膺自信老兄憐
弱弟豈關天下少良朋何時杯酒看浮白清夜肴
蔬粗滿登離思隔年詩不盡秦梁雖遠速須膺
病中聞子由得告不赴商州三首

病中聞汝免來商旅雁何時更著行遠別不知官爵好
思歸苦覺歲年長著書多暇真良策從宦無功漫去鄉

惟有王城最堪隱萬人如海一身藏

免來商

十道志商州上洛郡禹貢梁州之域周豫州境漢武置上洛縣于此潁濱遺老傳輟十九

舉進士釋褐二十三舉直言仁宗親策之于廷輟因所問極言得失考官司馬君實第以三等胡武平以為不遜力請黜之上不許曰以直言召人而以直言棄之天下謂我何宰相不得已寘之下第除商州軍事推官王介甫不肯撰詞知制誥沈文通亦考官也當制有愛君之言時先君被命修禮書輟乃奏乞養親三年

商州

與地廣記商契始封于此秦內史地西魏置洛州後周改商州九域志屬永興路古

商國秦商君之邑張儀詐以商於之地六百里賂楚即此太平寰宇記屬山南西道東北至東京千二百里西北至長安二百六十里

近從章子聞渠說

公自注章子惇也

苦道商人望汝來說客有

靈慚直道逋翁久歿厭凡才夷音僅可通名姓癭俗無

由辨頭顱答策不堪宜落此上書求免亦何哉

章子

宋史章惇字子厚浦城人舉進士甲科初調商洛令曾慥高齋漫錄子瞻任鳳翔節度判官章

子厚為商令二人相得甚歡

答策

樂城集策畧云今海內窮困生民愁苦而宮中好賜不為限極

所欲則給不問有無司會不敢爭大臣不敢諫國家內有養士養兵之費外有北狄西戎之奉陛下又自為一阱以耗其餘恐以此得謗而民心不歸也頽瀆遺老傳王介甫意其右宰相專攻人主比之谷永宰相韓魏公哂曰此人策語謂宰相不足用欲得婁師德郝處俊而用之尚以谷永疑之乎

辭官不出意誰知
敢向清時怨位卑
萬事悠悠付杯酒
流年冉冉入霜髭
策曾忤世人嫌汝
易可忘憂家有師
此外知心更誰是
夢魂相覓苦參差

附子由次韻三首

怪我辭官免入商
才疎深畏忝周行
學從社稷非原本
近讀詩書識短長
東舍久居如舊宅
春蔬新種是吾鄉
閉門已學龜頭縮
避謗仍兼雉尾藏
南商西洛曾虛署
長吏居民怪不來
妄語自知當

見棄遠人未信本非才
厭從貧李嘲東閣懶學諛
張緩兩腮知有四翁遺跡
在山中豈信少人哉
塤動簾鳴只自知
憂輕責少幸官卑聲名漫作耳
中填科第空收領底髭
西鄙猖狂猶將將中朝閑
暇自師師近成新論
無人語仰羨飛鴻兩翅差
病中大雪數日未嘗起
觀號令趙薦以詩相屬戲
用其韻答之

經旬臥齋閣終日親劑和
不知雪已深但覺寒無奈
一作

那飄蕭紙窗鳴

別本作明訛

堆壓簷板墮

公自注關中皆以板為簷

風颭

助凝冽幃幔困掀

一作軒

簸惟思近醇釀未敢窺璨璫何

時反炎赫却欲躬白磨誰言坐無羶尚有裘充貨西隣

歌吹發促席寒威挫崩騰踏成逕繚繞飛入座人歡瓦

先融飲雋餅屢臥嗟予獨愁寂空室自困坷欲為後日

賞恐被遊塵浣寒更報新霽皎月懸半破有客獨苦吟

清夜默自課詩人例窮蹇秀句出寒餓何當暴霜雪庶

以躡郊賀

號

元和郡縣志號縣在鳳翔府北三十里古號國周號叔所封太平寰宇記謂在府南四十里以壬寅

二月詩考之當從寰宇記

趙薦

字賓卿臨邛人皇祐三年鄭獬榜登第

何時反炎赫

韓愈詩皇天何時反炎燠

慎按杜子美哭李尚書之芳云詩家秀句傳

本五言詩也施注新刻本于五言之下增寒

餓二字作七言句者訛今駁正

附子由次韻

吾兄筆鋒雄詩俊不可和雪中思清絕韻惡逾難

奈殷勤賦黃竹自勸飲白墮言隨飛花落意與長
風簸餘力遠見撩千里寄璀璨嗟予久廢學有類
轉空磨研磨久無得安可待充貨空記乘峽船行
意被摧挫溟濛覆洲渚冷冽光照座我唱君實酬
馳騁不遑臥譬如逐獸盧豈覺山徑坳酒肴助喧
熱筆硯盡沾浣詩詞禁推類令肅安敢破亦有同
行人牽挽赴程課爾來隔秦魏渴望等飢餓徒然
遇佳雪有酒誰與賀

歲晚相與饋問為餽歲酒食相邀呼為別歲至除
夜達旦不眠為守歲蜀之風俗如是余官于岐下
歲暮思歸而不可得故為此三詩寄子由

饋歲

農功各已畢歲事得相佐為歡恐無及假物不論貨山
川隨出產貧富稱小大寘盤巨鯉橫發籠雙兔卧富人
事華靡綵繡光翻座貧者媿不能微挈出春磨官居故
人少里巷佳節過亦欲舉鄉風獨唱無人和

摯

與摯同曲
禮作摯

鄉風

何遜詩鄉鄉自風
俗處處皆城市

附子由次韻

周公制鄉禮無有相通佐鼎肉送子思蒸豚出陽
貨交親隨高低豈問小與大自從此禮衰伏臘有
饑卧鄉人慕古俗酬酢等四座東隣遺西舍迭出
如蟻磨寧我不飲食無爾相咎過相從慶新春顏
色買愉和

別歲

故人適千里臨別尚遲遲人行猶可復歲行那可追問
歲安所之遠在天一涯已逐東流水赴海歸無時東隣
酒初熟西舍蔬亦肥且為一日歡慰此窮年悲勿嗟舊
歲別行與新歲辭去去勿回顧還君老與衰

附子由次韻

富貴日月速貧賤覺歲遲遲速不須問俱作不可
追親舊且酬飲送爾天北涯歲去雖無情從我歷
四時酌爾一杯酒留我壯且肥長作今歲歡勿起

異日悲掉頭不肯顧
曾莫與我辭酒闌氣方橫
豈信從爾衰

守歲

欲知垂盡歲有似赴壑蛇
修鱗半已沒去意誰能遮
況欲繫其尾雖勤知奈何
兒童強不睡守歲夜謹一作喧譁

晨雞且勿唱更鼓畏添杓
坐久燈花一作爐落起看北斗

斜明年豈無年心事恐蹉跎
努力盡今夕少年猶可誇

赴壑

李商隱樊南甲集
赴壑而一去無返

附子由次韻

於菟絕繩去

是歲壬寅

顧兔追龍蛇奔走十二蟲羅網

不及遮嗟我地上人豈復奈爾何未去不自閒將
去乃諠譁天上驅獸官為君肯停撾魯陽揮長戈
日車果再斜釃酒勸爾醉期爾暫蹉跎偕醉遣爾
去壽考自足誇

讀開元天寶遺事三首

一本題云開元遺事三首

姚宋亡來事事興

外集作生

一官銖重萬人輕朔方老將風

流在不取西蕃石堡城

開元天寶遺事

晁公武郡齋讀書志開元天寶遺事四卷漢王仁裕撰凡一百五十九條

朔方老將

舊唐書王忠嗣傳玄宗方事石堡城詔問攻取之畧忠嗣奏云石堡城險固若頓兵

城下恐所得不如所失上不快會董延光獻策請下石堡城詔忠嗣分兵應之忠嗣僂俛而從及延光過期不克訴忠嗣緩師故無功遂徵入朝以哥舒翰代之其後翰大舉兵城拔死者大半竟如忠嗣之言

石堡城

唐書吐蕃傳吐蕃陷石堡城天寶初令皇甫惟明王忠嗣為隴右節度不能克八載哥舒

翰攻而拔之改石堡城為神武軍

潭裏舟

外集作春一本作車

船百倍多廣陵銅器越溪羅三郎官

爵如泥土爭唱弘農得寶

一本歌

潭裏舟船

唐書地理志京兆府萬年縣有廣運潭天寶三載常堅開舊唐書常堅傳天寶元年

擢堅陝郡太守水陸轉運使乃擁渭水作興成堰于長樂坡下漑水之上架苑牆東面有望春樓樓下穿廣運潭以通舟楫二年而成預于東京梁宋作小解底船二三百隻置于潭側皆署牌表之若廣陵郡船即堆積廣陵所出錦鏡銅器海味會稽郡船即銅器吳綾絳紗凡數十郡三郎懶真子錄嘗記開元
中有劉朝霞獻俳文于明皇云遮莫你古來五帝怎如我今代三郎○按明皇兄弟六人其一早亡寧王薛王兄也申王岐王弟也故稱三郎弘農得寶歌常堅傳先是人間戲也純囊得休耶潭裏舟船開揚州銅器多三郎當殿坐看唱得休歌至開元二十九年田用秀上言見之

元皇帝云有寶符在陝州桃林縣尹喜舊宅發使求得之改桃林縣為靈寶及譚成縣尉崔成甫翻出此詞使婦人唱之為得寶弘農野弘農得寶耶云云開天傳信記上于弘農得寶符白石篆文成乘字識者云乘字四十八年得寶之年遂改天寶也唐詩紀事崔成甫為陝縣尉更得體歌為得寶弘農野

慎按得體字舊唐書注云都董切此體字之本音也補注者改體為體謬以千里矣讀書不識字貽誤非細特為牽連駁正

琵琶絃急哀梁州羯鼓聲高舞臂韞破費八姨三百萬
大唐天子要纒頭

梁州

鄭榮開天傳信記西涼州新製曲曰涼州明皇
襍錄上歸自蜀乘月登樓命歌涼州即貴妃所

製程大昌演繁露樂府所傳大曲惟涼州最先出會
要自晉播遷內地古樂遂不存苻堅滅涼始得漢魏
清商之樂及宋武定關中收之入江南隋平陳獲之
文帝以為華夏正聲乃置清商署煬帝立清樂西涼
等九部後遂訛為梁州洪容齋隨筆涼州後轉為梁
州唐人已多訛用其實從西涼來也樂府詩集涼州
歌序亦稱梁州曲分門古今類事唐天寶中樂章皆
以邊地州郡為名如涼州甘州是也蔡寬夫詩話教
坊大曲猶是唐本而絃索守之尤嚴故言涼州者謂
之絃索取其音節雄繁也唐起樂皆以絃聲而竹聲
次之鱣頭太真外傳上戲曰阿瞞樂籍今日幸得供養
之鱣頭夫人請一鱣頭○按御覽云舊俗賞歌舞人
錦綵置之頭

上謂之鱣頭

慎按以上三首施氏原本不載外集編第三
卷鳳翔時作也今從之



蘇詩補註卷三